

沈忠敏公龜谿集

沈忠敏公龜谿集卷第九

啟

賀除留守啟

伏審賜環亟下信節遄歸飭燕館以留居御朝端而趣對身關國體想忘跋履之勞德享天心宜擁福釐之集恭惟某官朝廷碩輔社稷宗臣以皋夔之才逢堯舜之主引君當道蚤輸密勿之忠措世太平已底經綸之績勳銘具在紀律畢張聿從真館之游乃託介藩之任申伯之居南國雖賴蕃宣周公之詠東山終還左右及此介圭之覲實符仄席之求諒展辰猶數膺晝接然以素望之所屬必惟舊人之是圖竚秉國均轉洪鈞之一氣

益熙帝載平泰階之六符載念微生嘗叨異顧與燕雀
而同賀庶桃李之垂陰

問候中書啟

伏念某猥以微生叨從末宦效九九之技負若江湖之
濱瞻兩兩之符恍然雲漢之表顧門牆之彌峻致竿牘
之罕通引領云勞傾心則壹恭惟謀謨帝所勸相王家
順迎六氣之和茂擁三靈之祐伏以某官夙鍾閒氣親
際昌辰遂以非常之才助成無競之烈發揮一德使邦
朋之寢消感槩百爲由國是之先定及此精神之會應
於寤寐之求天睠孔昭民瞻允屬據百僚之上已知體
貌之崇居三事之先卽俟儀形之正上以副一人之意

下以慰四海之心更乞深念宗祊加護寢餼某卑情無任祝頌虔切之至

賀漕使加職啟

伏審顯膺徽數寵進崇資凡託庇庥舉深欣屬恭以某官存心甚遠養氣至剛亮節端誠實表儀於當世危言鯁論皆根本於生民不圖近功可贊大事憤愚民之冒昧連狡寇之猖狂爰飭使軺式嚴師律九攻九拒多自於指蹤萬舉萬全豈容其假息至於轉餉曾不乏供果消南顧之憂遂蠲西清之秩策勳方茂第賞惟新觀賜札之系傳知召環之狎至退惟陋質叨沐餘光承命之初爲喜益倍

謝薦舉啟

課功無狀偶逃大吏之譴訶進秩有階忽冒上臣之薦
籍過形褻字加賁沈蹤顧塞責之靡遑唯銜恩而獨至
竊以聖人以學而成俗是爲教化之原儒者以道而得
民非若簿書之比故於州縣之職莫先庠序之聯雖列
處侯邦第使視曹於幕府而選從帝學更令通籍於橋
門至煩一代之宗師並舉四方之寒畯號曰吾屬收爲
已知然而泮水泛居或類河中之木需章典奏必蒐席
上之珍宜得魁壘軒昂之才加以疏通該洽之識名實
四達言行兩純使之無遺庶云有補如某者天資昏懵
人品羈單少也讀書徒粗知於爲己長而干祿蓋苟求

於及親以應俗多老生之常談而經世乏古人之大節
長恐沒齒分爲散材乃霑黃甲之恩漸免白丁之役及
補郡吏復居校官設施皆熟於平時游處旣多於暇日
稍尋黃巷轉授青衿必有我師雖欲從其善者此非子
座豈待請而避之跡未至於顛隲心已慚於忝冒方期
斥去遽辱名聞此蓋伏遇某官提衡九流推轂多士小
德役大德每蹈孟軻之言先知覺後知將成伊尹之志
遂以丹青之定價勉茲白社之寒生不閒庸愚亦加采
錄顧矜憐之若此歎報効之云何某敢不增所未長鞭
其不及駑馬十駕庶申伏櫪之悲敝帚千金終發掃門
之喜

謝運使差權知縣事啟

恭承郵報俾攝縣章調宓令之琴焉知政理擁毛生之檄聊遂親謀蒙幸有餘包羞無所伏念某欽欽可笑約結亡奇惜學難成顧短檠而自媿薄游寡偶撫長鋏以誰憐栖遲太學之十年竊取奉常之一第尚須官次伏處鄉邦誰是餽漿之人空餘乞米之帖茲因弭節方獲曳裾擢於田里之中寘在門牆之末公移遠逮就假一雷之封疾置驚傳親著五雲之字顧惟凡瑣乃爾遭逢此蓋某官遠業濟時高風勵俗裕民足國已操邦計之羸謫德量能更欲人材之當故令散吏輒補曠官某敢不勉盡所長以待乃事體一日葺居之戒寧憚小勞臻

五月報政之期庶收微效

問候運使啟

嚮自揚船督府引襖行臺濫從俎豆之間數奉珪璋之表竭來敝邑阻拜前塵緬惟規略之餘休有神明之相恭以某官望隆當世行配古人才地有餘雖多多而倚辦辭源無極猶戛戛以知難言皆合於上心動必關於國體暫屈經綸之手遂恢富足之原言聽計行實逢千載之會家給人足更邁九年之儲柄用可期師瞻已峻更乞上爲宗祏加護寢興某下情無任祈嚮依歸之至

新令遠迎狀

伏審某官比膺芝綍屈領銅章調必令之琴行觀美政

整王喬之舄共仰仙風退念飄蓬之餘空懷揚糝之懼
承顏之幸翹足以須

賀毛給事啟

伏審溫綸亟下大旆遄歸騰聞四方聳動羣聽竊以殿
中獻納之地是爲門下論駁之司非風節梗槩則不足
以典樞機非論議該通則不足以承顧問故揚雄於漢
擢先待詔之聯而李藩在唐望隆批敕之手得人如此
視古庶幾恭惟某官學爲儒宗才配人傑持心耿介壓
嵩岱而不移蘊量恢閎包滄溟而無際炳文章之光焰
極師友之淵源名蓋一時用先諸老徐堅真舍人樣蚤
擅中朝望之實宰相才聊從外補席方及煖政已報成

紫泥俄見於賜環青瑣復參於持橐想金甌之久覆指
玉鉉以旋登公論所期斯言可必某繆從末路景仰英
風茲聞明命之頒彌激懦衷之喜榆枌斥鷃敢知鵬運
之高庭戶飛蠅但欲驥程之遠依歸抃躍倍百等倫

賀賈舍人啟

伏審茂膺詔檢寵進詞垣聯侍從之榮班極文章之盛
選音騰疾置光勳故鄉恭以某官學配古人才高當世
早馳妙譽擅滄海之遺珠獨冠賢科應崑山之片玉用
先諸老擢自一人校讎兼六籍之微刊正盡羣言之失
踐揚滋久問望益隆進直螭坳記載之功唯允首陪雞
戟調護之德攸全爰從禮樂之司入掌絲綸之地舍人

一
集
樣有如此大手筆無甚難紅藥裁詩暢中和之遠韻紫
薇草詔追顥噩之醇風紹蘇賈之才名超伊管之相業
乃符輿論亦出家聲某蹤跡陸沈音塵斗曠側聞成命
之出彌增末契之榮目想俊游輒起彈冠之興心懷美
廕尤傾賀厦之誠

謝改差常州學官啟

問塗湘水方懷陟屺之思易地蘭陵復預采芹之樂幸
旣安於子職喜遂發於親顏揣分云優循涯以愧伏念
某天資樛昧人品羈單妄刻意於詩書旋躡蹤於衿佩
一隨計牒九換年華苾韭春秋屢動故園之興齋鹽朝
暮貪觀上國之光偶脫白丁遽聯黃甲洎親榮三釜之

祿飾身叨五兩之綸謂寸進之可期宜分陰之亦競而
乃赴銓十月補吏一涯取道重江念毛生之檄徒捧待
期薦歲顧墨子之突未黔敢圖小物之私曲綴大賢之
念達籲天之危惻遂擇地之初心訖使便安盡從願欲
茲蓋某官恩深教載德懋燮調推大鈞之無垠眾由平
進謂小人之有母獨軫深慈便菽水之奉於近鄉脫風
波之危於遠役矜憐若此報稱云何某敢不激昂其衷
砥礪所學庭聞愛日已寬遲暮之懷庠序承風益廣朋
游之樂

賀馮承旨啟

伏審鋒車入覲斧戾對揚超玉筍之新班冠金鑾之舊

直除音四出歡頌一詞竊以舉三代之遺英而當號令
文章之事取四海之雋望而總言語侍從之官此上所
以篤於近臣而世亦將期以大用況夫親承密旨獨望
清光地接六符之中階秩高兩禁之上列帝選於眾公
惟其人恭惟某官炳獄瀆之靈盡東南之美德量蓋存
夫遠大道術已造於純全氣讐九州繇真養而無害才
周萬事殆曲成而不遺忠旣格於天淵信亦行於蠻貊
晝膺三接歲閱九遷詞掖代言思若湧泉之決儒官正
席化如時雨之施騰聞東序之絃歌歸聽北扉之鈴索
方將攄尊主庇民之術豈特煥經天緯地之文遽銜恤
於倚廬致興思於仄席聿頒召節仍趣賜環天子虛懷

安問鬼神之所以都人拭目復觀風采之凜然迨出親
除式昭異數定見金甌之覆卽期玉鉉之登德裕之文
用雖長於大手吉甫旣相禮自絕於同僚斯言不誣惟
日以俟某離奇弱質么麼微生頃蒙特達之知曾乏先
容之助側聞顯渥倍激驩悰久託範模行費大鈞之塊
土僅同燕雀更欣夏屋之翬幪

賀新守盛學士啟

伏審細札疏恩左符分命起自列僊之館來臨多士之
鄉芹藻生輝布韋增氣恭以某官剛明蓄德端厚凝姿
粲然星斗之文粹矣珪璋之表賢關闊步早收俊造之
科仕路橫翔遂入英雄之光堯嫌名乘輅擅膚使之譽列棘

聳名卿之稱醞藉有餘於風流緣飾無先於儒雅一昨
辭榮北闕均逸南州田里絕歎息之聲治功藹著庠序
修孝弟之義名教勃興集此美談發於遺愛況蘭陵之孔
道接茗水之上游喬木相望稔服善鄰之教令甘棠具
在飫聞雅俗之歌謠用是此邦絃誦之徒思見我公色
笑之樂茲聞除日實激懽悰顧惟齎鹽之冷官曾是門
闌之下客燕雀相賀同看大厦之蔭成桃李方華獨認
舊蹊之路穩依歸扑躍倍萬等倫

賀盧左司啟

伏審祇承嚴召亟被峻除顯陟中臺之端榮居上宰之
屬音騰郵置驩動搢紳竊以尚書會萬事之本元左司

貳六曹之綱轄所以抗議軒陛參謀廟堂因唐建官始

重都公之號迨宋稽古實爲法從之儲惟

御名

柬求豈輕

除授恭以某官氣壓萬象心潛九流本師友之淵源發

文章之光燄出符國瑞同威鳳之九苞居協地靈配元

龜之五總爰自早歲竭來上都勃焉起三俊之名凜然

歸四海之望旣橫翔於雄

光堯御名

遂獨步於英躔絳帳談

經咸忘鼎來之學赤裳賦命遽詠遄歸之詩方追臺妙

之游復領使華之寄雖登車之志遠念側席之恩深是

宜趣還庸副虛仁欲知相業試觀省闈之彌綸行慶帝

俞卽步禁塗之清切自顧門闌之下客曾塵衡石之上

游寅緣蕪辭竊取英眄喜樂正之好善亦旣有爲謂公

叔之爲文豈能無望

賀毛顯謨知鎮江府啟

伏審某官懇辭清禁榮統要藩嚴助懷歸本厭承明之
直蕭傳復出蓋觀宰相之材唯其被寵光而益新所以
全譽處而彌固有識相慶不謀同詞恭以某官望重吏
師學深王佐秋陽江漢會道術於環中景星鳳凰聳德
名於天下勁氣發後凋之操沈謀迎先見之幾忠無他
腸才有餘地視文章之小技素所優爲舉節義之大閑
方將獨立笑曲士之未徧爲賢者之不能故於用舍重
輕之間以見進退難易之際抗章避寵奏屢卻而復前
褒詔賜俞意重違而愈厚訖從荷橐爰假竹符峻秘職